



Sesida dals

Communitgà ils

Protocol nr.

24 d'avust 2020

28 d'avust 2020

686

## Dumonda Rettich

concernent la mancanza d'ina emprima scolaziun sco factur da ristga

### Resposta da la Regenza

*Tar la dumonda 1:* Per il chantun Grischun n'existan naginas retschertgas che quantifitgeschan il grad da qualificaziun da persunas che fan l'emprim pass en la vita professiunala.

*Tar la dumonda 2:* Senza ina (emprima) scolaziun terminada po la garanzia da l'existenza esser periclitada. La consequenza è savens ina mancanza da pussaivladads da gudogn e consequentamain ina ristga da povradad pli gronda. Persunas en ina posiziun sociala bassa han cumprovadamain in'aspectativa da vita pli pitschna e pateschan pli savens da disturbis corporals u psychics (cf. scola auta spezialisada bernaisa per mauns da l'Uffizi federal da sanadad publica, Daten zur Gesundheit von Sozialhilfebeziehenden – Machbarkeitsanalyse, 2019). Cunzunt la dischoccupaziun da lunga durada po avair differentas consequenzas, sco per exempel problems psicologics e problems da sanadad, izolaziun culturala e sociala (stigmatisaziun) ubain tensiuns e conflicts en famiglia (cf. SECO, Bericht Langzeitarbeitslosigkeit, 2018).

*Tar la dumonda 3:* Cun enquistas a la fin dal temp da scola obligatoric e cun soluziuns transitoricas eruescha il Management da cas Furmaziun professiunala (MCFP) da l'Uffizi per la furmaziun professiunala (UCFP) quels giuvenils che n'han nagina soluziun da cuntinuaziun. Quests giuvenils, ma er persunas che n'han nagina soluziun da cuntinuaziun suenter ina interrupziun da l'emprendissadi, survegnan ina brev dal MCFP e pon trair a niz voluntarmain l'accumpagnament dal MCFP. L'introducziun d'ina obligaziun correspundenta per cuntanscher in'obligaziun pli ferma n'è betg prevista en il sector da la furmaziun professiunala, er betg per l'accumpagnament dal MCFP, e na correspundess betg al sistem. En connex cun l'execuziun da la Lescha davart l'assicuranza cunter la dischoccupaziun datti differentas pussaivladads per accumpagnar giuvenils dischoccupads. In augment da la purschida da mesiras per

giuvenils ch'èn annunziads tar l'assicuranza cunter la dischoccupaziun, na para actualmain betg necessaria. En il sector da las mesiras per il martgà da lavur dispona il chantun dal program da giuventetgna spezialisà Funtauna a Cuir. Quest program da l'Uffizi per industria, mastergn e lavur accumpogna giuvenils dischoccupads tar la tscherna da professiun, tar la tschertga d'ina piazza d'empredissadi e tar la concepziun dal mintgadi. En il rom da l'agid social han las vischnancas la pussaivladad da disponer cundiziuns en il sector da l'integraziun professiunala. Sche giuvenils na retiran ni prestaziuns da la cassa da dischoccupaziun ni prestaziuns da l'agid social s'enter il temp da scola obligatoric, n'existan naginas obligaziuns.

*Tar la dumonda 4:* Sin fundament da la Lescha federala davart il perfecziunament (LFPerf; CS 419.1) s'engascha la Confederaziun, ensemen cun ils chantuns, per che personas creschidas mantegnian las cumpetenzas fundamentalas e possian acquistar cumpetenzas mancantas. Durant la perioda da promoziun 2017 fin 2020 vegn fatga en il Grischun ina retschertga davart tut la purschida existenta cun l'intent da pudair eruir il basegn ed identifitgar eventualas purschidas mancantas. Sin basa da quai duai vegnir concludì sin plaun chantunal davart la participaziun durant la perioda da promoziun 2021 fin 2024. La fin d'october 2019 ha il Departament social da la citad da Turitg lantschà in project da pilot davart novas strategias da furmaziun per personas pauc qualifitgadas. La finamira è quella da meglierar – cun scolaziuns e cun furmaziuns supplementaras – las schanzas sin il martgà da lavur en spezial per personas pauc qualifitgadas. Ultra da personas che retiran agid social vegnan sustegnidas er quellas Turitgaisas e quels Turitgais che sa chattan oz bain en la vita professiunala, che han dentant ina piazza ch'è periclitada en il proxim futur. In sustegn ed in accumpagnament sistematic e stretg datti er per giuvenils da 16 onns e dapli che han gronda fadia da midar da la scola en la vita professiunala. Per la Regenza n'èsi actualmain betg necessari d'elavurar ina strategia chantunala da furmaziun per personas pauc qualifitgadas, sumeglianta a quella dal Departament social da la citad da Turitg.



En num da la Regenza

Il president:

A handwritten signature in black ink, appearing to be "Chr. Rathgeb".

Dr. Chr. Rathgeb

Il chancelier:

A handwritten signature in black ink, appearing to be "Daniel Spadin".

Daniel Spadin